



19951/p

Last leaf belongs
to another work

F. XI

18/d

XX
DISSERTATIO INAUGURALIS
MEDICO-PRACTICA,

DE

MEDICATIONE
MORBORUM
OCULARIUM SINE
OPERATIONE
MANUALI.

Digitized by the Internet Archive
in 2018 with funding from
Wellcome Library

<https://archive.org/details/b30366276>

DISSERTATIO INAUGURALIS
MEDICO - PRACTICA,

DE

MEDICATIONE MORBORUM
OCULARIUM SINE
OPERATIONE MANUALI,

QUAM,

ANNUENTE SUMMO NUMINE,

Ex Auctoritate RECTORIS MAGNIFICI,

DION. GODEFR. VAN DER KESSEL,

J. U. D. ET PROFESSORIS JUR. CIV. ORDINARII,

NEC NON

Amplissimi SENATUS ACADEMICI *Consensu*,
& *Nobilissimæ* FACULTATIS MEDICÆ *Decreto*,

PRO GRADU DOCTORATUS,

Summisque in MEDICINA Honoribus, ac Privilegiis
rite ac legitime consequendis,

Publicæ ac Solemni Disquisitioni submittit

FERDINANDUS DE JEAN,

BONNENSIS.

Ad diem 2. Julii MDCCLXXIII. H. L. Q. S.

Ab hora undecima ad duodecimam.



LUGDUNI BATAVORUM,

APUD { SAM. ET JOANN. LUCHTMANS, }
 { ET }
 { JOANN. HENRIC. VAN DAMME, }

1773.



V I R I S
NOBILISSIMIS AMPLISSIMIS
NATALIUM SPLENDORE,
MUNERUM AMPLITUDINE ILLUSTRIBUS,
INDIÆ ORIENTALIS
BELGICÆ MODERATORIBUS.

VIRI NOBILISSIMI AMPLISSIMI.



bsit, ut sexdecim volvendis mensibus
orbes elapsi animo meritorum semper
memori benefacta deleverint, quibus
cumulatissime auctus, jurabam nullam
tam longam temporis moram, nullam
tam ingratae oblivionis injuriam vel levissimas nube-
culas obducturam.

Quod vivo, quod beatus vivo, quod Palladi Batavæ operam dedi; Vestram hanc benevolentiam, Vestrum favorem, Vestrum munus, agnôsko lubens. Vos! Vos vocavit & impulit, qui auspiciatissimum in Indiam Orientalem cursum ante tria lustra instituenti, fortunarum mearum fundamentum poneretis, mihi Propitium NUMEN, Cui primas, Vobis, VIRI AMPLISSIMI! secundas gratias habeo, & immortales habebo.

Si memoriam vestram, quibus copiam de plurimis bene merendi fecit, beneficium in me ignotum ac peregrinum hominem, collatum fortasse fugerit (nam animos vere magnos, quodcunque acceperint, semper delectat; at iisdem, quæcunque ipsi benefecerint, facilis obrepit oblivio) ecce me hujus infirmitatis (si dicenda est infirmitas, & non verius generosa negligentia) monitorem.

Et si nil habeam, quod tanta vestra merita æquare possit, id tamen consequor hoc quantumlibet levi

redhostimento, quod infame immemoris animi vitium
a me quam longissime amoveam. Si itaque placide
benigneque accipietis hanc meam, quam Nominibus
Vestris Amplissimis, facram facere audeo, *Disserta-*
tionem alterum hoc erit mihi beneficium, alter favor,
alterum munus.

Quanquam quid potest æquius excogitari, quam
ea ad Vos redire, a quibus profecta accepi. Chi-
rurgum ad Indiam misistis, inde reversus & interiora
Hippocratici studii penetralia visendi amore exardens,
has meorum laborum in ACADEMIA LEYDENSI exant-
latorum primitias, hunc ingenii & qualiscumque in-
dustriæ foetum, quem quintus ab hoc annus produ-
xit, ea, qua par est veneratione, ad Vos, VIRI
AMPLISSIMI! defero.

Plura majora lubentissime darem, si haberem: sed
neque Vos poscitis, neque mearum virium est. So-
la voluntate non displiceam, quod meis deest viri-
bus, suppleat Benignissimum NUMEN, Vos diu ser-

vans

vans incolumes; firmum sit Consiliis Vestris in Patriæ
commoda vigilantium Præsidium, Domosque Vestras
Omni bonorum genere adaugeat, cumuletque. Ita
precatur

VIRI NOBILISSIMI AMPLISSIMI

Devotissimus ac Obedientissimus

FERDINANDUS DEJEAN.



onstitueram prius pro *Dissertatione inaugurali medica tibi offerre expositionem morborum in navibus INCLYTÆ SOCIETATIS ORIENTALIS BELGICÆ, Bataviam versus iter facientibus, obviorum; sed re serio perpensa vidi Clarissimos Viros in hoc negotio sat superque desudasse, inter quos sufficiet memorasse Clar. S. DE MONCHY Dissertationem, quæ Actis Harlemsibus inserta est; Ingeniosissimi ac Illustrissimi Viri JOHN PRINGLE tractatum de morbis Castrensibus; perspicacissimi J. LIND tractatum absolutissimum de Scorbuto, ac illum, qui tractat de morbis Europæorum in climatibus calidioribus; nec non experientissimi LUD. ROUPPE dissertationem de morbis navigantium. Igitur cum exarata mea dissertatio nil vel parum novi haberet, quod ab hisce præclaris Viris enucleatum non fuerit, hinc ab hac materia abstinui, illam forte alia & opportuniori occasione resumpturus. Interim Adversaria mea practica evolvens amplam materierum segetem inveni, ex qua præsens dissertatio exsurgit: arrisit præ cæteris hujus argumenti, in Illustri hac Academia parum ventilati, dignitas.*

*Neque hanc dissertationem sermone eleganti commen-
dandam, nec stylo suo ornatiori, nec verbis concinnis
tibi placituram, facile prævideo: ast affirmare audeo,
praxi stabilitam ac confirmatam continere materiem.
Animo benevolentiori, ut illam tibi offero, sic accipe-
re digneris, L. B. etiam atque etiam rogo; & si
fructus aliquis ex illa in genus humanum redundet,
lætabor. Vale & fave Auctori, L. B. Supremum
interim Numen supplex oro, ut cæptis meis annuat.*

Inter fenforia compositissimus oculus etsi, quam plu-
rimas patitur vitiositates. *Illustr. H. D. GAUBII*
Patbol. §. 709.



D I S S E R T A T I O
M E D I C O - P R A C T I C A

D E

MEDICATIONE MORBORUM
OCULARIUM SINE
OPERATIONE MANUALI.

§. I.



o usque oculi humani cognitio anatomica provecta est, ut vix alia corporis pars sit, cujus clarior de singulis membranis, cavitatibus, humoribus & motibus habeatur doctrina. Nam, si pauca excipias, singularum fere particularum, quæ ad fabricam oculi pertinent, rationem & usum, cur adsint & quid operentur, aut quam functionem exerceant, assignare licuit, in primis postquam luminis & colorum theoria egregie exculta, lentiumque vitrearum affectiones, ad explicandam oculi actionem commodissimæ, a physicis & mathematicis perfectius investigatæ sunt. Quamobrem morbi etiam & præternaturales hujus organi status majori accuratione examinari, eorumque curationes tali successu institui potuerunt, ut audacissimæ operationes chirurgicæ summa cum felicitate a peritis viris excogitatæ atque susceptæ fuerint, quibus visionis defectus corrigerentur & restituerentur. Reliquos etiam ejus morbos, quibus manus mederi nequit, salutaribus remediis tum internis, tum externis adgredi ars medica docuit. Qua-

re neque pauci neque proletarii scriptores exstant, qui hoc scientiæ medicæ momentum quam optime, & partim quidem singularibus libellis, partim inter reliqua sua opera pertractarunt, ex veteribus HIPPOCRATES, GALENUS, C. CELSUS, P. ÆGINETA; ex recentioribus autem V. F. PLEMPIUS, P. FORESTUS, G. FABR. HILDANUS, ISB. DE DIEMERBROEK, NIC. TULPIUS, OLAUS BORRICHIVS, TH. BARTHOLINUS, A. NUCKIUS, BIDLOO, JOH. HARTMANN, JO. RAUIUS, FR. PETITUS, VALSALVA, PITCARNUS, MARIOTTE, BRISSEAU, GUILLEMEAU, H. SLOANE, WOOLHUSE, BOERHAVE, MAUCHART, HEISTERUS, PLATNERUS, IRKA, & plures alii, quorum fide & peritia trecentos fere oculares morbos a se invicem distinguere, eorum causas nosse, & permultorum fortunatam & faustam curationem instituere didicimus.

§. I I.

In morbis oculorum tamen accidit fere, quod de dentium doloribus per jocum affirmant, tot esse ad eorum curationem consultores medicos, quot sunt amici, aut vitæ socii, aut advenæ, sæpissimeque unum hominem quæ juverint remedia, alteri temere & incassum adhiberi, in iisdem vero morbis oppositam aliquando medelam requiri, nec constantem medicamentorum circa oculorum perversitates observari effectum. Cui medicationis incertitudini, pro mea tenuitate, conabor hisce pagellis aliquale fulcrum & stabilimentum conciliare, *regulas scilicet aliquot generales proponere*, quas in curatione eorum morborum ocularium, qui operationem manualementalem non admittunt, observare oporteat.

Cui conatui ut B. L. æqui bonique consulere velit, iterum atque iterum rogo, oroque.

§. I I I.

Quando sylvam remediorum, apud dictos celebres auctores & in empirica praxi oculis destinatorum circumspicio, patet, nullum præter

ter

ter oculum corporis humani viscus aut organon esse, quod tot tantisque varietatibus remediorum tractari, quod tam diversa applicata perferre queat, sive ea quæ per os assumantur, sive ea, quæ exterius adhibentur, consideres. Nulla enim *evacuatoriae methodi* species superest, quæ non in iisdem oculorum morbis aliquando profuisse legatur; arteriotomia frontalis, temporalis; venæ sectiones variæ; scarificatio; hirudinum suctus; setacea; fonticuli; ustiones; vomitoria; purgantia plurium ordinum; diuretica tam acria, quam blandiora, diaphoretica, apophlegmatizantia per nares & os; vesicatoria tam frequenter perperam & cum damno adhibita; phænigmi & emplastra rubefacientia temporibus applicata. Videas omne genus *resolventium remediorum* suaderi, mercurialia; antimonialia; lignorum piperacea decocta; salina tam alcalica, quam media; millepedum & aliorum insectorum acrimoniam; herbas & radices amaras. Neque minus copia *emollientium* suadetur forma vaporis, fomenti, cataplasmatidis, unguenti; ex lacte, pinguedine varia, mucilaginosi, ovis. *Tonicorum* vel *exsiccantium* frequens in primis usus commendatur interne & externe, desumptorum ex alumine, vitriolis, zinci floribus; calcibus metallorum, saturninis, corticibus & herbis adstringentibus. *Balsamicorum* denique, aut *sanguinem*, uti vocant *depurantium* omnes fere classes adhibitas esse videas. Qualem insignem remediorum & methodi varietatem in cæterorum corporis humani viscerum morbis superandis nusquam observamus.

§. I V.

Magnæ autem hujus varietatis causa præcipua, imo fere unica, ea esse videtur, ut, quum in reliquis partibus corporis unus tantum, vel certe pauci humores agitentur & secernantur, *in oculorum organo formando omnes fere naturales humores concurrant*; unde fieri omnino debet, ut singulorum etiam humorum vitia in oculum ingeri, ejusque actiones turbare queant. Quin etiam dum reliqua viscera magis similem solidorum fabricam habeant, *in uno oculo cuncti fere par-*

tium solidarum ordines reperiuntur, ideoque hujus morbi tot vicibus multiplicantur, quot sunt solidarum partium modi. Natura igitur dum ad oculorum fabricam perficiendam omnes fere suas opes atque divitias impendisse videtur, pro eo beneficio duram mercedem exigit, ut oculus cunctarum reliquarum partium peccata luat, vitiorumque totius corporis particeps fiat. Ad oculi functionem scilicet confluunt *nervi* copiosissimi, & multo plures, quam in ulla alia parte; *arteriæ venæque* numerosæ ex trunculis variis; *vasa alba serosa & lymphatica* sincero albore conspicua; *musculi* præ cæteris omnibus mobiles valde & irritabiles; *membranae* variae; *membranae corneae*; *cartilago*; *ossâ*; *ductus excretorii differentes*; *tela cellulosa*; *cutis*; *pili*; *nerveus succus*; *sanguis*; *lymphâ tenerrima*; *lymphâ acris urinosa lachrymarum*, *succus amarus biliosus*; *succus tenax ceraceus lemarum*; *pinguedo* tenera dulcis. Ex quo mirabili partium concursu efficitur, ut medici practici attenti, si vel solos ægroti oculos intueantur, singulorum fere per totum corpus disperforum solidorum & fluidorum statum naturalem & præternaturalem dijudicare didicerint, & per unici hujus organi conspectum totius corporis integritatem aut læsiones noscant, oculorum ideoque intuitio unum ex primariis semiologiæ tam diagnosticæ, quam prognosticæ sit fundamentum; quoniam dum reliquarum partium singulæ cum singulis tantummodo aliqualem consensum habent, oculi consentiunt cum cunctis, & universali hac sympathia, quidquid in cæteris bene aut male agitur, aperiant atque demonstrant.

De singulis harum partium constituentium breviter agemus.

§. V.

NERVORUM quidem in oculis tanta vis & copia est, quantam nullibi reperimus: uni enim huic organo destinantur paria integra *secundum*, *tertium*, *quartum*, *sextum*, & insignes præterea rami paris *quinti* & *septimi*, forsan etiam *octavi*. Per quos funiculos vitales copiosus perpetuo succus cerebri in oculos ingeritur, quo oculi in
foetu

foetu prius & citius, quam reliqua corporis organa, vigent & crescunt, atque dein per totum vitae decursum vivaces, splendidi, ad sentiendum & movendum aptissimi, *spasmis* autem ac *doloribus* praë aliis partibus subjecti sunt: etsi enim physiologorum circa succum nervosum, vel sic dictos *spiritus animales*, controversiis me immiscere non desidero, hoc tamen certum esse puto, *in cerebro* aliquam causam actuosam, quietis impatientem & eam quidem materialescerni, quæ meditationibus & laboribus consumi, somno autem & analepticiis cibis & medicamentis restitui possit: quare quo minus spirituum animalium titulo insigniamus, quid obstat? hujus liquidi materialis spirituosæ bonitas & sufficiens copia *splendore* manifestatur, quo oculus sanus, & præprimis juvenilis, fere instar adamantis coruscat, quemadmodum ejus defectus *languore oculorum* statim observabilis est; ejusdem nimius influxus autem singulari illo *fulgore*, quo iracundi & maniaci hominis oculi *rutilant*, manifestus evadit. Hic splendor in medio oculi est, ubi uvea tunica per corneam & retina per crystallinum corpus & pupillam transparet: nam splendor adnatæ tunicæ ex causis accidentalibus, de quibus postea, oriri potest, nec designat muneris nervosi rationem. Vero autem simile est, verum oculi splendorem, vivacitatis indicem, oriri ex perpetua vibratione fibrarum nervearum, nunquam quiescentium, cujus vibrationis aut tremulæ oscillationis mensuram quidem, propter ejus teneritudinem, capere non licet, sed ex solius splendoris majori aut minori gradu debet æstimari. Quemadmodum adamantis politæ cuspides majori aut minori earum agitatione plus aut minus luminarium radiorum reflectunt, ita intentior aut remissior fibrarum medullofarum cerebri & nervorum motus, quem Illustris ac Egregius Anatomicus, P. CAMPERUS, tam egregie demonstravit, fortiolem aut debiliorem earum partium coruscationem facit. Si hominem *gutta serena* laborantem intuemur, ejus tunica adnata sæpe albissima est, sed media pars oculi propter immobilitatem quasi emortua apparet. Similiter *hemeralopia* & *nyctalopia* quando sine dolore sunt, solius systematis nervosi sunt affectiones, splendorque in utroque morbo cessavit, & in illo quidem cum

cum impossibilitate ampliandæ pupillæ, in hoc cum impedimento contrahendæ. Et hi quidem sunt primarii morbi ex nervorum vitio solo oriundi, *languor* scilicet ac *rutilatio*, *gutta serena*, *hemeralopia*, *nyctalopia*: nam reliquæ visionis læsiones & hallucinationes, uti etiam spasmi, dolores & paralyfes oculorum potius ex aliarum tam solidarum, quam fluidarum partium, quam immediate ex nervorum perversitate fieri solent. Signa autem, ex quibus dijudicari potest in solis nervis morbi causam hæere, sunt *primo*, si post accuratum examen constat, omnes reliquas corporis partes & actiones sanas & salvas esse, aut si qua earum læsio adsit, nullam neque temporis neque loci ratione ejus cum oculario morbo communionem esse. *Secundo*, si causæ præcesserint, quæ cerebri & nervorum systema manifeste lædant, *graves animi affectus*, *capitis percussiones* & *vulnera*, *mercurii præposterus usus*, aut *aliorum venenorum infelix adsumtio*. *tertio*, si cum oculorum vitio simul adsunt alia cerebri perturbati symptomata, *judicium læsum*, *memoria fracta*, *vertigo matutina*, *imaginatio perversa*, *morbi convulsivi* & *paralytici*. Atque tunc non modo non prodest, sed potius nocet omnis medela, quæ ad scopum cerebri restituendi non dirigitur, in primis methodus evacuans & debilitans, ut copiosa exempla docuere. Potius acerba prognosis fieri debet, quia cerebri & nervorum, quæ quasi radicem vitalitatis constituunt, læsiones difficulter sanantur. Nisi tamen per vulnera & similes solidarum partium læsiones morbus sit inductus, aliqua spes dari potest per ea remedia adhibita, quorum virtus & actio in nervos per experimenta innotuit. Ubi enim nimius spirituum animalium in nervos oculi influxus est, magnum *opii* remedium habemus, cujus in sananda nimis aucta visione & inprimis *hemeralopia* nondum confirmata, in qua scilicet rigiditas pupillarium & ciliarium fibrarum nondum orta sit, egregia vis est, si debito ordine & dosi & cum necessariis cautelis exhibeatur. Longe frequentiores autem illi occurrunt casus, ubi vis nervorum debilitata requirit, ut *nervinis* & *analepticiis* remediis sufficiens spirituum animalium influxus restituatur. Cui scopo antiquissimis experimentis præcipue destinantur *herbæ* &

radices, sic dictæ, *antihystericæ*, singulari, leniter ingrato odore pol-
lentes, valeriana, nardus Celtica, allium, polium, pulegium, ma-
rum verum, ruta, asæ foetidæ succus, & alia ejusmodi; uti & *partes*
animalium foetidæ, castoreum, zibethum & moschus; item salia vo-
latilia, & olea foetida ex animalibus, ex cornu cervi, ex viperis, &
ferico, & ex sale ammoniaco per alcali fixum præparata. Horum enim
usu diu continuato non modo *presbyopia senilis*, sed etiam juvenum,
nervorum debilitate affectorum imminuta visionis claritas, uti & illa
imbecillitas, quæ nimia lectione in locis illustratis, aut immodica
applicatione ad minutias cernendas, aut microscopicis exercitationibus
inducta est, multum restitui potest. Quibus de remediis memorabile
est, quod bruta animalia noctu vagantia, quæ scilicet in parva luce
tamen acute cernere amant, velut cattus, vulpes, lupus, lutra, glis,
&c. odore eorum valde alliciantur, ut etiam solenne sit venatoribus
foetida ejusmodi his animantibus tanquam escam, quæ ad captum ea
invitet, proponere, & quam hæc bruta sæpe ex longinquo quærunt,
ipso scilicet instinctu naturæ edocta, hæc remedia suorum oculorum
vivacitati proficua esse.

§. V I.

SANGUINIS per arterias & venas oculorum vecti, si in eo morbi
causa hæret, plane alia ratio & curatio esse debet. Nimia enim san-
guinis ad caput & ad oculos congestio morbos creat permultos, qui-
bus non modo visio, sed etiam motus oculorum impediatur. Eam
autem causam subesse docent non modo generalis hominis affecti
constitutio, quando plethora ingens, spissitudo sanguinis, viscosa ejus
pinguedo, facilisque ex parvis causis ebullitio, & ad hæmorrhagias,
præsertim narium, proclivitas molesta est, ætas juvenilis. Multoque
magis, si propter vini & spirituosorum potuum nocturnum usum, aut
propter tale vitæ genus, in quo caput prominulum servatur, aut
propter nimium calorem capiti applicatum, v. gr. insolationem, vel
ignis & flammæ frequentem conspectum, sanguinei humoris ad caput
& oculos congestio facta est; imo etiam si per spasmos abdomina-

les, aut pedum continuam in aquis refrigerationem, aut per importunam tussim, in qua respiratio diu retardatur, vel per nimis protractam tiliarum & aliorum instrumentorum musicorum pneumaticorum inflationem, sanguinis per caput motus augetur. Ex his enim causis oculi *turgent*, *palpebrae* & *locus sub palpebra inferiori inflatur*, *tunica adnata rubet*, dolet, & quandoque *inflammatur*, aut *ecchymosis* fit, ut sanguis coagulatus intra lamellas tunicae adnatae colligatur, quae collectio si infortunato in *camera anteriori oculi*, aut in *vasis choroideae & uveae tunicae* contingit, visum perdit, atque si *tunicam retinam* similiter afficiat, subitanam *scotomiam* & *amaurosin* producit. In hisce morbis facile pervidetur, quod ab illis remediis nervinis, quae superiori paragrapho proposita sunt, nullus possit sperari fructus, & potius omnia illa fieri debeant, quibus sanguinis fervor temperari & ejus versus caput congestio averti queat. Venae sectionis repetitae, si nil obstat, praecipua hic virtus est, tum ut per salia media, nitrum, sal mirabile Glauberi & per decocta attenuantia, serum lactis, per eccoprotica & acidorum vegetabilium prudentem usum, sanguis attenuetur; imo duriori malo durior quoque cuneus est opponendus: sic plus quam centies Inclytae hujus Academiae decus, Immortalem BOERHAVIUM secutus, dum in libro *de morbis oculorum*, capite *de Ophthalmia* agens, drastica hydragoga suadet, habita tamen ratione, ut, peracta validioris purgantis actione, lene opiatum exhibeatur: haec methodus una cum applicato ad oculos collyrio, loc. cit. descripto, toties aëgris meis non solum solamen, sed & curationem perfectam, citamque attulit. Nec minus causae malum augentes & confirmantes intermitti debent: sic a spirituosius abstineat aeger, vitae genus ad tempus mutet, &, si possibile est, tussi suae aut aliis spasticis morbis abdominalibus medeatur, aut naturales haemorrhagias forte intermissas restituat medicus. Et hi quidem morbi satis facile ut plurimum curantur, *si scilicet a sola causa sanguinea sunt*: nam ex sequentibus patebit, *eosdem fere morbos ex longe aliis humorum vitiis etiam nasci*, tumque remedia temperantia, mox proposita, inania esse & incassum plane adhiberi.

§. VII.

BILIS enim inter causas morborum ocularium sibi multo maiorem partem vindicat, quam quis crederet. Naturaliter enim *in omnibus oculis colligitur bilis, & quidem atra*, scilicet niger ille succus, qui posteriorem cameram & partem choroideæ tunicæ illinit, quem NIC. PECHLINUS ad explicandam nigredinem Æthiopum argute & vere consideravit, qui succus in omni animantium genere, & in ipso etiam homine, non pro æthiope minerali ex spiritibus animalibus mercurificatis & sanguinis sulphure composito, ut nuperrime auctori Gallo, viro cæterum egregio, visum est, est habendus; sed, cum gustu sit amarissimus, pro vero bilioso est habendus ille succus, qui ex vasculis tunicæ choroideæ & uveæ probabiliter eodem modo secernitur, uti amarum aurium cerumen ex vasculis tunicæ internæ meatus auditorii. Ut autem biliosus humor semper aliquam habet acrimoniam, propter quam in toto corpore calorem auget, vasa stimulat, sensationes vividiores facit, ita videtur in oculis etiam locatus esse, non modo ut nigredine sua transitum luminis per tunicam uveam impediret, eoque illis radiis, qui directe per pupillæ foramen intrant, maiorem claritatem conciliaret, sed etiam ut amaritie sua & acritate nervulos sensiles tunicæ uveæ irritabiliores, ideoque constrictioni & dilatationi pupillæ magis idoneos redderet. Quemadmodum ergo bilis multorum aliorum morborum in toto corpore, & præcipue in illis locis, ubi naturaliter colligitur aut evacuatur, auctor esse solet, dum vel copia peccat, vel qualitates perversas morbosasque acquirit, ita etiam in oculis frequentissimæ malæ affectiones a solo hoc pigmento atro, præternaturaliter se habente, oriuntur. Etsi per anatomiam nondum accurate detectum sit, ex quibus fontibus niger ille humor propullulet, multoque minus per quæ vasa resorbeatur: est tamen vero proximum & analogiæ totius systematis vitalis consentaneum, quod idem humor non semper ex iisdem particulis constet, sed quod, ut reliqui humores, quotidie mutetur, quod particulæ quædam resorbeantur in venas & novæ ex arteriis iterum generentur: ne-

que minus probabile est, hunc humorem in aliis hominibus & alio tempore acriorem & fervidiorem esse posse, quam in aliis; certissimæ enim & copiosissimæ experientiæ mihi demonstrarunt, pessimum illud *chronicum erysipelas internum oculi*, quod sub titulo *ophthalmiæ chronicæ* tam in ætate infantili, quam adulta sæpissime occurrit, a sola causa biliosa oriri; nam si ex sanguinis stagnatione unice hic morbus proveniret, tunc non ita diuturnus foret, citiusque vel resolvendo dissiparetur, vel in suppurationem transiret & *hypopion* formaret, id est, abscessum internum oculi. *Erysipelas* autem plane alia est inflammationis species, quam vetustissimi observatores semper bilioso humori adscripserunt, qui acri suo stimulo perpetuum illius loci, in quem depluit, dolorem & *diuturnam sine erosione* molestam sensationem facit. Eodem etiam modo chronica illa ophthalmia se habet: nam locus affectus est uvea sola tunica, dum plerumque oculi externi partes illæ sæ apparent, vel si qua earum molestia est, per accidens hæc accidere solet; ægroti autem perpetuo oculis clausis, aut in debilissima luce constitutis, vivere coguntur, a parvo enim radio lucis per pupillam transeunte mox acerrimus dolor subnascitur, siquidem pupilla tunc se contrahens fibras nerveas aut nerveo-musculares iridis necessario movet, qui motus summe dolorosus est & intolerabilis evadit: nam retinam non affectam esse exinde scimus, quia sensus luminis & potestas videndi remanet, visio itaque non impossibilis, sed tantum dolorosa evadit. Hæc ophthalmia illis præcipue pueris frequentissima est, qui *favo capitis* (vulgo *dauw-worm*) laborant, bilioso scilicet illo *favo*, ex quo *materia flava, melleæ consistentiæ & gustu amarissima excernitur*: cujus melleæ materiæ effluxus si ex causa quadam præternaturali impeditur, non modo alios in corpore morbos biliosos, febres scilicet tertianas aut quartanas, hepatisque & lienis infarctus & dolorosas viscerum & artuum affectiones, sed etiam *ophthalmiam, dictam chronicam*, copiose producit. Idem diuturnus tunicæ uveæ dolor sæpe relinquitur post *morbillos* imperfecte curatos, post *purpuram & miliarem febrem* minus bene cedentem, aut post importunas *tertianas* febres, in quibus ante sufficientem bilis evacua-

tio-

tionem febriles motus cessant, aut supprimuntur. Omnes enim hos morbos biliosæ profapiae esse, etsi hoc loco id demonstrare alienum sit, verissimæ practitorum observationes confirmant. Quam ob causam hæc chronica ophthalmia tam frequenter a medicis & medicamentis male tractatur: nam venæ sectiones & sudorifera & vesicantia toties improbe applicata, quia humorem ipsum illum biliosum oculi neque emendare neque evacuare queunt, malum potius exasperant, & reliqua resolventia, externe aut interne adhibita, inutilia sunt, quia fontem mali non attingunt; dum e contra quidquid bilis ardorem temperare & illius nimiam copiam ex corpore eliminare valet, satis promptè juvare solet. Imperanda scilicet est abstinencia a carnibus, piscibus, ab ovis, a lacte, a vino calidiorē, omnibusque quæ bilem generare & augere observantur; solis blandis vegetabilibus, farinaceis, pane bene cocto & leguminibus temperatis corpus nutriendum; concoctioni autem ciborum in ventriculo præprimis prospiciendum est, non per amara medicamina, bilem augmentia, sed per lenia spirituosā, veluti paucas guttas essentiae corticum aurantium & similes carminativas; præterea per quotidie repetitam tincturam rhabarbari, tantum miti dosi datam, ut alvum purgando ne debilitet, aut his substitutam aliquando pulpam cassiæ & tamarindorum, biliosi humores perpetuo per urinam evacuandi sunt; prodest etiam salis Glauberi vel cibarii moderatus usus, ut & aquæ marinæ, cujus potum in hac ophthalmiæ specie toties profuisse vidi, & cui simplicem aquam salitam cum eodem effectū multo commodius substitui posse, insignissima observatio nuper adhuc ab Illustri ac Venerabili nostro GAUBIO, Præceptore ac Promotore meo ad ultimum vitæ halitum colendo, evulgata in *Adversariis* suis egregiis *Capite primo*, docuit. Nam falsa bili semper adversa reperiuntur; quare etiam illæ animantium partes, in quibus materia salina eminet, velut millepedes, aliquem in hoc morbo fructum præstant. Externe autem vix aliud quid præter aquam purissimam, vel eam lenissime spirituosam redditam, oculis imponere licet, quæ per poros bibulos assumpta biliosam in oculis acrimoniam mitigare & simul ad resorptionem disponere queat.

§. V I I I.

LYMPHA URINOSA LACHRYMARUM novus fons est morborum ocularium. Nam urinofam voco, quia nulla lympa totius corporis tam manifeste falsi ammoniacalis est; tale sal autem præcipuum urinæ characterem facit. Salsa hæc lympa in glandula lachrymali potissimum secernitur, & tanta copia secernitur, ut aliquando plures ejus unciae, paucò tempore super genas & per nares lachrymantium defluentes, multa linteamina madefacere soleant. Ex quo solo phænomeno certi scimus, ingentem vim materiæ falsæ ad oculos deferri posse; quæ si moderate adfluit, oculis maxima commoda præstat: lavat videlicet corneam tunicam, pelluciditatem ejus conservat, & fordes pinguedinosas, de quibus sequenti commate dicam, resolvit & ne spissitudine nimia noceant, aut visum turbent, moderatur.

Dumque eadem falsa materia palpebras perpetuo alluit, harum nerveas fibras quodammodo irritat & vasa palpebrarum lemosa stimulat ad excretionem; quem usum naribus quoque præstat, in quas dum per canalem nasalem intrat, mucum tenaciorem resolvit, & excretionem ejus augendo cavitatem nasalem depurat. Nimis acrem autem hanc materiem sive lympham falsam esse posse, vel hoc solum consuetissimum symptoma docet, quod diu lachrymantibus, etiam sanis hominibus, tota adnata rubeat, palpebræ tumeant, totusque oculus doleat: id quod eo magis contingit, si materia hæc salina lachrymalis præter naturam acrior evadit; tum enim veræ oculorum erosiones cum insigni dolore, rubore inflammatorio, sæpe partium quoque vicinarum exulcerationes cum fluxu continuo copioso ichoris nascuntur, pinguis etiam lemosus palpebrarum mucus nimium resolvitur, unde margines palpebrarum exeduntur, cilia decidunt, tumensque interior palpebrarum tunica fædam inversionem earum facit; unde morbi admodum varii, varioque nomine insigniti, ex eodem tamen fonte manantes, oriuntur, *epiphora* scilicet lachrymosa vel *lippitudo*, id est, abundans ac dolorosus lachrymarum chronicus fluxus involuntarius; *psorophthalmia* vel lippitudo pruriginosa, margines palpe-

pebrarum erodens; *maderosis*, id est, ciliorum defluvium nunquam deinde renascentium; *ectropium* vel inversio palpebræ inferioris; *ta-
raxis*, id est, rubor continuus adnatæ tunicæ & aliquando ipsius corneæ, cujus pelluciditas abinde perit; *ulcera* totum bulbum consu-
mentia; *ulcera* tandem *vere cancroſa* glandulæ lachrymalis; quibus etiam narium variæ erosiones, tanquam sequelæ ejusdem acrimoniæ, sæpe sociantur. Gravissimi hi morbi causas antecedentes habent omnes eas, quæ acrimoniam falsam in corpore vivo augent, aut ejus natu-
ralem cum urina excretionem quotidianam imminuunt aut turbant. Ex *variolis* imprimis confluentibus bis talem epiphoram prurigino-
sam & ulcerosam remansisse vidi: variolæ enim confluentes a benignis ideo mihi differre videntur, quia in his contagium variolosum sangui-
nis pinguiore partes obsedit, & propterea cum vera suppuratione ex-
cernitur; in illis autem cum falsis serosis particulis combinatum veræ suppurationis est incapax. Neque minus a *scabie ad faciem versa*; nam etsi scabies per se nunquam faciem petat, infantes tamen, imo & adulti impatientiores frequenti manuum scabiosarum ad oculos ad-
frictu hos vere inficere & pſoram oculorum producere solent, ut no-
runt præprimis illi, quibus sanitas cohortis militaris vel nautarum in nave degentium demandata fuit; sique tunc plurimi individui, ut fieri solet, simul scabie corripiantur, hæc, de qua loquor, oculorum pſo-
ra fere semper observatur. Deinde illa *tinea contagiosa*, quæ puero-
rum capita quibusdam in regionibus fœdat, & a favo ideo diversa est, quia in hoc succus mellæ consistentiæ & saporis amari, in illo autem crustæ siccæ, furfuracæ, saporis salſi urinosi ex cute exsurgunt; illa, inquam, tinea sicca, si ad oculos convertitur, pessimas sæpe im-
medicabiles & cancroſas erosiones oculorum produxit. Tum quibus urinæ naturalis fluxus ex causa quacumque imminuitur, ut in *affe-
ctione hysterica*, in *asthmate convulsivo*, *nephritide calculosa*, *ischuria notha*, *hydrope* & similibus morbis evenit, quid mirum talia obtine-
re? cum venerandus PRÆCEPTOR quotannis discipulis suis in egre-
gia sua *Pathologia* ad §. 657. narrare solebat, quod, dum cubicu-
lum ægroti cujusdam ischuria laborantis intraret, sæpius observave-
rit,

rit, urinoso illo sale & oleo alcalino & rancido ægroti perspirationem, totiusque cubiculi atmosphæram simili fœtore infectam fuisse, ut intranti apparuerit, urinam putrescentem in cubiculo asservari; quid mirum, inquam, si his frequenter oculi pruriginosi, lippientes & fluxi reperiantur? *Arthritici* ut plurimum primo intuitu a medicis pro talibus cognoscuntur, quippe quorum oculi semper in margine palpebrarum rubent; ex lymphâ enim acriori erodente medicus ad lymphæ totius corporis præternaturalem crasin sæpe concludit. Etiam *Hypochondriaci* illi, quorum lymphâ nimis acida est, præter alia hujus aciditatis symptomata molesta, lippitudinem crebro patiuntur. Talis igitur acrimonia urinosa, in oculos illata, plane aliam curandi viam & methodum sibi expescit, quam illi, de quibus superioribus commatibus diximus, morbi. Namque ut falsedo illa pruriginosa superetur, interna & externa remedia, eaque ut plurimum continuanda desiderantur. Interna præcipua ex *balsamicis* constant, quippe quorum oleosa & blanda conditio falsedinis quasi antagonista existit. *Radices* scilicet *alexipharmacæ* angelicæ, levistici, helenii, meu; *semina carminativa* anisi, fœniculi, carvi, cumini, coriandri, tum *gummatâ semiresinosa* myrrhæ, bdellii, opoponacis, & ipsa *balsama cum resinis veris*, balsami peruviani, terebinthinæ, olibani, mastiches; quo etiam moderatus *aloës Succotrinæ* & cum balsamis mixtus usus pertinet. In primis in his morbis etiam prodest, ut falsæ materiæ congestio ab oculis ad alia loca avertatur: quare cum in sanguineis & biliosis oculorum morbis *vesicatoria ex cantharidibus* graviter nocere soleant, *in his acribus morbis maximi usus esse deprehenduntur*, si nuchæ; aut, quod præstat fere, suris pedum applicentur & aliquoties repetantur. Propterea *diuretica* quoque remedia plus quam in reliquis præstant: præter balsama enim paulo ante citata, in quibus ipsis vis diuretica latet, *millepedum* crebrior exhibitio, & *aquæ calcis vivæ internus cum lacte usus*, & *saporis veneti* aliorumque blandiorum alcalinorum salium cum balsamis conjunctio. In primis autem *ventriculi digestioni prospiciendum & bilis moderate augenda & roboranda est*. Ipsa enim illa acrimonia his præ reliquis nascitur, qui-

quibus in prima officina cibus non satis excoquitur; quare amara medicamina cum mitioribus aromatibus conjuncta, his oculorum morbis egregie medentur. Neque omittenda sunt externa ipsis oculis applicanda media, eo scilicet tendentia, ut acrimonia falsa lachrymarum temperetur. Profunt *fumi balsamici* ex olibano, mastiche, succino in linteaminibus excepti, sicci & calidi ad oculos frequenter admoti. Utilitatem adferunt *aquæ destillatæ balsamicæ* fœniculi, rosarum, hyssopi, calendulæ: fructum habent *absorbentia tenerrima*: perlarum, testæ ovorum, tutiæ & nihili albi, cum aquis ejusmodi balsamicis in formam collyrii mista: emolumento sunt ipsa *spirituosa* cum aquis diluta, ut spiritus vini antiquus & Gallicus & Rhenanus, aut essentiæ croci, myrrhæ & spiritus vini matricalis & mastichinus. Nonnunquam *saturnina* remedia externa suum habuerunt usum, quatenus, vasa constringendo nimium acrimoniæ fluxum ad oculos reprimunt; quo casu tamen provide agendum, ne materia a suo effluxu cohibita, & ad interiora oculi conversa, plus ibi malignitatis, quam in externis & bulbum ambientibus partibus suscitet. Tutiores effectum præstant *mucilaginosæ*, ut mucilago seminis cydoniorum, farina fœnugræci, & similia tenerrima cum lacte recenti subacta; quo etiam celeberrimum linimentum Equitis Britannici, HANS SLOANE, referri potest. Atque cum hi morbi pruriginosi & erodentes sæpe a scabiosa dispositione ducant originem, scabiei autem *sulphur vivum* modo specifico medeatur, exempla mihi constant certissima, florum sulphuris mixtionem cum unguento pomato, palpebrarum marginibus adfrictam, diuturnos & ad quævis alia maxime pertinaces oculorum morbos cito curasse. Tandem si eo usque hujus acrimoniæ malignitas increvit, ut cancrosa oculi metuenda sit exulceratio, ad lenia arsenicalia externe applicanda confugiendum esse, experientia indubie me docuit: *arsenicum* scilicet *cum nitro probe fixatum*, cum vitello ovi tritum, lenissima dosi solvendum est in aqua calcis vivæ & hæc ulcerato oculo cum linteis carptis applicanda.

§. I X.

LE MOSUS MUCUS intra ductus serpentinos palpebrarum secretus aliorum iterum morborum sedes est & causa. Naturaliter hic succus parva quantitate ex sanguine separatur, per eosdemque marginum palpebrarum poros, ex quibus scapi pilorum ciliarum eminent, exsudans eos margines inungit, ut nec a frequenti nictitatione sua, nec a volantibus per aëra asperioribus & acrioribus corpusculis læderentur aut eroderentur. Est autem hic succus spissus, atque tenacitate sua omnes naturales humores corporis humani superans, viscidus instar ceræ, vel instar vernicis, insipidus præterea aut subdulcis, omni acrimonia carens. Convenit fere cum illo succo, qui intra laryngem ex incognitis hætenus fontibus generatur, & cartilagine laryngis vernicis specie quasi obducens ad claram vocem edendam idoneas reddit. Ea etiam mucilago, quam a descriptore suo *Haversianam* vocamus, quæ inter articulos secreta cartilaginum polituram & ad liberiores motum aptitudinem facit, ejusdem cum *lemis* palpebrarum videtur esse naturæ & conditionis. Omnis homo sanus mane, post placidum somnum peractum, hujus lemosi muci portiunculam digitis suis averrere solet; nam vigilantibus per continuum palpebrarum motum sponte consumitur. In statu autem præternaturali hic humor a debito tenacitatis gradu & a dulcedine sua vario modo deflectit, multæque ægritudinis fundamentum ponit. Nam aliquando nimia quantitate productus *epiphoram lemosam* vel *catarrhum palpebrarum* facit, quæ ab epiphora lachrymosa, cujus §. 8^{va}. facta fuit mentio, multum differt, etiamsi propter nominis identitatem a plurimis sæpe confundatur. Si enim nimius ejus proventus sit, palpebræ noctu conglutinantur, & cilia ita inter se implicantur, ut non sine molestia & dolore palpebræ aperiri possint, nisi postquam tenax hoc gluten opere ex ciliorum nexu extricatum est; quin etiam interdum palpebræ ejusdem abundantia fœdantur. Quando hæc epiphora sine dolore & tumore & inflammatione succedit, neque nimis diu protrahitur, minus

nus pro morbo , quam pro crisi quadam habenda est , qua se natura a tenacibus particulis liberans , oculorum majorem posthac splendorem & mobilitatem conciliat , id quod in ætate infantili frequens bonum de statu futuro oculorum & totius corporis præsagium format. Crebro autem contingit , ut hic lemosus succus non modo quoad copiam abundans , verum etiam justo fluidior redditus , molestam longo tempore fluxionem faciat , cujus multi & mali sunt effectus. Nam a nimia hujus succi lubricitate palpebræ emolliuntur & intumescunt , pori ciliorum ampliantur , cilia ipsa cum suis radicibus bulbosis excidunt , defensio igitur corneæ ab illabentibus ab extra asperis & lædentibus corpusculis , quam a ciliorum debita positione habet , privatur ; præterea cornea ipsa denso quasi glutine perpetuo obducitur , lumini impervia redditur , adeoque visionis impedimenta fiunt , quæ *lippitudinis* species aliquando per totam vitam affligit , & propterea inprimis molesta est , quod luminis radii per obscuratam corneam , ut Illustris simul ac Expertissimus in adornandis experimentis physicis , JOH. ALLAMAND , Præceptor meus omni obsequio colendus , in cursu suo experimentalis physico demonstravit , quod luminis radii , inquam , per obscuratam corneam non sinceri , sed in colores distincti intrent , ut homo colores iridis perpetuo videat , & vesperi circa lucernam circulus coloratus instar halonis appareat , qui lectionem & quamcumque aliam accuratiorem visionem turbat. Quod vitium ab omnibus illis causis , quæ mucum nimium generant , produci potest , inprimis ab ætate senili , in qua propter caloris nativi defectum & imminutum sanguinis circulum chylus in sanguinem minus recte commutatur , totaque sanguinis massa frigidior & mucosa redditur , a qua intemperie mucosa per varias excretiones , ut per tussim senilem & frequentem scretum benigna natura se liberare studet , atque etiam per palpebras similem pituitam copiose evacuat. At vero etiam in juvenili ætate quodcumque mucum auget , ut habitatio in aëre humido subterraneo , comestio ciborum sine sale & aromate , pauperibus familiaris , sedentaria vita , ventriculi etiam per potulenta calida sæpius de die ingurgitata debilitatio , ejusmodi oculorum ca-

tarrhum generat. Inprimis autem cunctæ illæ numerosæ causæ, quæ œdemata & hydropem anasarca faciunt, etiam in oculis turpe hoc incommodum pariunt. Multo autem gravior exoritur morbus, si hæc lemosa materia ab excretionem per ciliorum poros plane impeditur: tum enim palpebra, inprimis superior, successive intumescens *strumam* format, tantæ sæpe molis, ut palpebra omni motu privata oculum perpetuo claudat, sanissimoque cæteroquin bulbo plenariam inutilitatem conciliet, dum radii luminis ab ingressu in corneam in totum excluduntur: quæ struma dein per accidentales causas inflammata, & ad suppurationem tendens, ulcera diuturna parat; totum aliquando sic oculum perdit, aut ad minimum, relictis magnis cicatricibus, gratiam & suavitatem faciei destruit.

In hoc hujus succi a sanitate recessu etiam hoc contingit, ut propter defectum lubricæ materiæ humores reliqui, præsertim lachrymalis, justo acriores fiant; quippe quorum acritas naturaliter a lemarum præsentia temperatur, unde erosiones bulbi oculorum & partium adjacentium fiunt non ex ipsa lachrymarum acrimonia, sed potius ab ejus visciditatis, quæ lachrymas temperare debebat, absentia. Quando igitur morborum ocularium fons in cacochymia humoris lemosi suam causam habere animadvertitur, tum alia iterum curationis methodus obtinet, ab illis, de quibus supra dictum est, plane diversa. Eo scilicet omnis medici intentio collimare debet, ut lemoso humori justa tenacitatis mensura restituatur, aut etiam ejus imminuta excretio restituatur. Nil magis hic prodest, quam prudens *mercurialium* internus usus, qui cum in cunctis superius recensitis causis morborum ocularium summe noxius sit, in his fere omnem absolvit paginam: Mercurio enim viscida resolvuntur, & adiposi inprimis & pingues humores evacuantur, daturque occasio, ut in loca evacuata novus dein & salubrior succus deponi queat. Mercurius inprimis sublimatus paucissimis granis, in spiritu frumenti dissolutus, & pro differentia ætatis & roboris parce datus, sed aliquamdiu continuatus, oculum ab omni tali molestia facile liberat. Sunt tamen & alia extra mercurium, quorum insignis hic fructus est; ea scilicet, quæ sub
ti-

titulo *remediorum antiscorbuticorum* veniunt ; radices acriores galangæ , zedoariæ , curcumæ , ari , pimpinellæ albæ , similesque herbæ beccabungæ , cochleariæ , nasturtii , quæ in forma varia , ut notum est , exhiberi possunt , inprimis si ratio quædam fuerit mercurii usum dissuadens. *Fuligo splendens caminorum* , in pillulas redacta , specificam utilitatem habet. His etiam externa jungere expedit. *Fonticulus* excitatus in brachio , vel in graviore casu *setaceum* per cutim ductum , quum in prioribus a me recensitis morbis parum fructuosum sit , in his casibus magno emolumento est ; nam evacuat ex tela cellulosa , ideoque ex tali loco , in quo adiposi & tenaces & mucosi humores naturaliter colliguntur ; tela autem cellulosa per totum corpus cohærens & consentiens mucositatem etiam ab oculis avertere solet. *Fumus tabaci* ore suctus , nil faciens in prioribus morbis , proficuum omnino deprehenditur , si a levis vitiatis ægritudo dependet ; uti etiam *sternutatoria* , naribus attrahi consueta , nam solvunt & evacuant mucum , consentiens autem cum naribus oculus partem fructus abinde habet. Ipsis autem oculis maxime prodest *mel rosarum* sæpius illiniri , cujus virtutes Magnus ac Illustris ille Anatomicus & Physiologus , B. S. ALBINUS (quem inter Professores meos annumerare posse mihi gratulor) remedii hujus quamquam simplicissimi nobis venerandus ille vir in collegio suo physiologico communicavit , dum de morbo graviore oculi ageret ; hujus enim resolvens ac emolliens virtus in pingui tenacitate neminem latet , cui etiam *stimulantia balsamica* externe jungi possunt , essentia *aloes* inprimis , uti & spiritus *salis ammoniaci* , cujus volatilis vapor , præterea quod mucum potenter resolvat , etiam nervos roborat , & in omni fere visus debilitate prodest. Præcticis suetum est in ejusmodi catarrhis *adstringentia* , ut *alumen* & *vitriolum album* , collyriis admiscere , quorum tamen adhibitio nonnunquam mala æstimari debet ; nam etsi oculos siccant , retinendo tamen materiam tenaciorem strumas aut alios tumores producere queunt : vitrioli tamen usus præstat usui aluminis.

§. X.

ADEPS in reliquis corporis humani locis tot morborum auctor, etsi naturaliter intra bulbum oculi non ingrediatur, eum tamen totum cingit, orbitamque implendo bulbum & ejus musculos & nervos fulcit, fovet ac mulcet; quare adipis *abundantia*, *defectus*, aut *acrimonia* vel *mucositas* morborum ocularium novam classem constituit. Si enim *abundat* nimium, tum totum bulbum ex orbita quodammodo protrudit, ut illa plica cutis externæ, quæ sanis hominibus ad marginem inferiorem orbitæ apparet, evanescat aut potius in monticulum elevetur, illamque sceditatem faciei creet, quam *Buphthalmiam*, vel *oculum bovinum* vocare solemus, cujusque varii gradus sunt, visionem quodammodo semper turbantes. Nam si hæc protuberantia magna est, tum bulbum oculi radiis obliquis solis nimis exponit, cogitque homines, ut arctius claudendo palpebras *luscitatem* acquirant, id est, aperturam palpebrarum semper justo minorem efficiant, quasi per parvam rimam objecta cernentes. Cum qua luscitate sæpe conjuncta est *Myopia*: etsi enim negare nolim myopiam, id est, quando axis accuratæ visionis valde brevis est, etiam ex corneæ aut lentis crystallinæ figura magis sphaerica derivari posse, observatio tamen docet, etiam sine hac homines myopes esse sola nimia bulbi extra orbitam eminentia. Quare homines natura non myopes, si rem propinquiorem vel minutio-rem spectare cupiunt, ope musculorum obliquorum bulbum quasi extrahere conantur: ob eandem causam infantes & juniores omnes propter copiam adipis propius vident, senes autem plerique, quibus oculi propter adipis imminutionem profundiores sunt, longius a se prospicere possunt, propinquasque minutias non nisi specillis adhibitis distinguunt. Unde causa etiam elucet, cur plerique myopes simul lusci sint, presbytæ autem late palpebras aperire consueverint. Namque *defectus* vel *insufficiens* copia adipis necessario contrarios effectus producit: scilicet bulbus tunc ad fundum orbitæ retrahitur, neque modo motum habet impeditiorem, quia musculi

sculi ab adipe non satis fulciuntur, atque mulcentur, sed etiam area, in qua objecta externa conspiciunt, fit minor, pauciores quoque radios luminosos recipiunt, ideoque quæ valde propinqua & parva sunt, a quibus igitur propter molis minutiem copiosi radii reflecti non possunt, difficilius vident & propterea *presbytæ* evadunt. Unde homo, cujus adeps in toto corpore per febrem, vel per salivationem mercurialem, vel per quamvis aliam causam consumtus est, cujus igitur oculi quoque profundiores in orbita absconduntur, semper *presbyta* est, propinquas scilicet litteras legere vix potest, donec restituto per bonam diætam & analeptica vigore, & recrescente per totum corpus adipe, orbitæ etiam denuo impleantur; tum enim *presbyopia* sponte cessat, & axis visionis ad pristinam mensuram redit.

Multo autem graviora oculi mala nascuntur, si adipis constitutio in *qualitate* peccat. Pinguedo enim orbitam implens naturaliter valde tenera, quasi medullosa aut butyracea est, sapore dulcis atque delicata, leniter mucosa, ut flammam alere nequeat, quemadmodum medulla ossium quoque & butyrum pro flamma lucernæ alenda inepta sunt, quæ igitur si *rancida* & *acris* evadit, eosdem morbos parat, quos medulla rancida in ossibus, *cariem* scilicet *ossium orbitæ*, inprimis illius tenerioris ossis, quod a similitudine *os unguis* appellatur, unde iniqua & raro curabilia ulcera fiunt, sensim ad nares serpentina, earum *septum* erodentia, ossi etiam ethmoideo communicata, tumque ex cerebri vicini affectione mortem inducentia, qualia in illis, qui ex venerea lue inveterata, aut ex antiquato scorbuto decedunt, frequentia sunt. Frequentius tamen idem hic orbitæ adeps *nimis mucosus* evadere solet, tumque speciem *buphthalmi* aliam, & ab ea, quæ in principio hujus §. descripta est, diversam facit: scilicet non tam ipse bulbus ad exteriora vertitur, quam potius adnata tunica cum palpebris simul turgentibus. Quando quis ex mœrore diu lachrymatus est, aliqua hujus morbi imago spectari potest: circumferentia scilicet oculi instar globi super faciem protuberat, ut ex illorum prominentia statim quilibet tristem mœrentis animum intelligere valeat. Puellæ autem *chlorotico morbo* laborantes tam elevatum oculi globum ostendunt,

dunt, ut medicus eo solo signo ductus non difficulter de natura morbi, antea etiam quam de eo moneatur, judicare sciat. Pejor hæc extorsio in quibusdam *hydropicis est*, quando adipis generalis in mucum conversio etiam in capitis telas cellulofas insinuatur. In cunctis hisce incommodis ad solius adipis boni restitutionem omnis indicatio dirigi debet, neque tamen hujus pagellæ limites de adiposorum morborum cognitione & cura ample satis dicere permittunt. Causæ enim vel diæteticae a victu vel copiosiori, vel justo parciori, vel pravo, item a sedentaria aut mobili vitæ ratione, aut ab affectibus animi dependent, vel a veneno quodam lente suscepto nascuntur, quæ prioribus peiores sunt; nam a reliquiis veneni *rhachitici*, aut *venerei*, aut *scabiosi*, aut *scorbutici* originem sæpe habent; quin etiam morborum prægressorum emaciantium aut replentium nonnunquam consideratio intervenit. Quare ad boni adipis generationem admodum varia remedia tam generalia, quam specifica requiruntur.

§. XI.

LYMPHA TENERRIMA, quæ internas oculi cameras replet, ultimum locum in hac nostra de humoribus oculorum consideratione occupato. Lympha hæc infalsa pellucidissima, inodora non modo anteriores binas cameras, quæ scilicet inter corneam & uveam, deinde inter uveam & crystalloideam membranam hærent, implet, verum etiam illam cameram, in qua humor vitreus est. Humor enim vitreus, etsi gelatinosus spissusque intuenti appareat, tamen ex doctrina Dexterrimi **RUYSCHII** mera lympha est inter tenues & arctissimos membranularum cancellos ita inclusa, ut non nisi his prius perforatis effluere queat, in integro autem vitreo corpore conclusa massam solidiorem quasi mentitur, quum revera fluxilis & mobilis lympha sit. Omnis hæc intra bulbum oculi collecta lympha præter dubitationem ex propriis vasculis, nondum satis demonstratis, excernitur, atque in alia vascula naturaliter quoque resorbetur, ideoque quotidie renovatur & regeneratur; alias enim suam dulcedinem &

per-

perspicuitatem tot annis, quibus homo vivit, conservare nequiret. Patitur hæc lymp̃ha & suos manes & morbos, sed proh dolor! raro, nisi per operationem manualement curabiles. Namque *abundare* potest, tumque corneæ tunicæ prominentem tumorem facit, spectaculo fœdo. Eadem *deficere* potest; tum collabatur cornea & rugas agit. *Effluere* potest in vulnere oculi; ubi tamen, ut observata, imprimis autem nobile DAVIELII inventum de extrahenda cataracta, cujus emendatam & felicissimam praxin a Celeberrimo *Winzelio* cum maxima laude exercitatam vidimus, probant, paucis diebus tota restituitur & regeneratur. Eadem lymp̃ha frequenter opacatur, alienumque colorem assumit, non modo in senili ætate, sed etiam in juvenibus, si causæ lympham turbantes vel oculo soli, vel etiam toti massæ humorum adhibentur.

Ejus obscurationis aquei humoris generale signum est, si colores iridis trans corneam pellucidam, vitioque sensibili carentem, vel in totum conspici nequeant, vel alieno colore tincti appareant. Causæ autem obscurationis permultæ observantur, ut *enormis calor externe oculo admotus*, v. gr. ferrum candens, aut ejus scintilla, oculo propius accedens, aut alia ambustio quælibet: dein *omnis inflammatio uveæ* similem obfuscationem relinquit, quæ, si vasa resorbentia uveæ destructa fuerint, nunquam posthac curabilis erit: tum cuncta ea, quæ lympham universi corporis generaliter inspissant; *arthritica dispositio*, *febris putrida*, *maligna*, *morbilli* frequenter, *epileptici motus*, *scorbutus* quandoque & *venena narcotica* copiose assumpta, velut *cicuta*, a cujus copiosa assumptione talia exempla prostant, aut *hyoscyamus* & *opium*, tandem *içterus* diu perpeffus. Quæcumque autem mali hujus morbi causa fuerit, curatio semper difficilis & exitus dubius manet: lymp̃ha enim semel corrupta, in reliquis etiam corporis humani partibus, ægre in pristinam integritatem restituitur; in oculis autem, ubi vel minima ejus labes tam sensibilem in visione effectum facit, vel nunquam vel tardissime emendatur. Operatio manualis in paucis casibus, nempe si corpus vitreum nondum opacatum, neque uvea tunica quoad solidas partes nimis læsa est, aliquid auxilii promittere vi-

detur, aperiendo scilicet corneam & emittendo humorem veterem, ut novus meliorque recrecat: de hac autem operatione ejusque cautelis in præfenti tractatione non agimus. Quin certum est, si vitium lymphæ universale in tali corpore fuerit, aut vasa humoris aquei fecer-
 nentia & resorbentia magnopere læsa sint, nil operationem proficere, quia in locum vitii humoris exhausti novus non minus vitiatu-
 crescet. Quando autem recens morbus fuerit, & causæ ejus non ni-
 mium malignæ aut insuperabiles, tum aliquid a medicamentis externis
 externisque ad hunc scopum directis effici posse non dubia exempla
 spem faciunt. Ægrotus a diætâ carnosa vinosaque, multo etiam ma-
 gis a spirituosiss potibus & aromatibus per annum & amplius plene
 debet abstinere; carnes enim & fermentati oleosique cibi lympham
 corporis humani deteriorem semper generant; nutriri autem debet fa-
 rinosis & succulentis fructuum horæorum & radicum, uti etiam ole-
 rum non acrium dapibus. Deinde, quantum ferunt vires, emeticis
 antimonialibus diu, sed prudenter, scilicet ne tanta copia assumantur,
 ut ipsum vomitum proliciant, verum ut stimulum non ventriculo soli,
 sed universo nervoso & glanduloso vasorum generi imprimant, uti
 oportet. Cui scopo vinum cum croco metallorum, aut cum vitro
 antimonii infusum, methodo Clar. HUXHAMII paratum, commode
 inservit, vel unum tartari emetici granum cum sufficiente quantitate
 oculorum cancerorum bene conteri, atque tum in decem, vel plures
 æquales partes dividi, singulisque diebus, antequam æger cubitum
 eat, vesperi una portio exhiberi potest. Neque minus decoctum ligni
 guajaci recentis, debita dosi per plures menses ingestum, commen-
 dari meretur. Sunt etiam, quos cortex peruvianus, diu assumtus,
 juverit, cujus virtus eximie roborans totam œconomiam animalem emen-
 dando, ejusmodi secretiones particulares nonnunquam restituit. Ex-
 terna remedia hoc in malo non magni valoris deprehenduntur, nisi a
 vapore spiritus salis ammoniaci fortissimi, ad oculum admissio, aliquid
 forte sperare liceat.

§. X I I.

Quæ hæcenus proposui cuncta, eum scopum habent, ut, quicumque etiam morbus oculis acciderit, si is ex *humorum aliquo vitio* originem fortitus est, in curatione ad *specialem hujus humoris emendationem, aut revulsionem, aut evacuationem* respici debeat. Quum igitur frequentissimus sit *ophthalmiæ* v. g. morbus, isque adeo pertinax sæpe & contra multa remedia tentata rebellis, ut per plures annos duret, hominemque dulcedine lucis & vitæ privet, cogitandum est, quod unus hicce morbus aliquando ex *spastica nervini succi agitatione* & in alio casu *ex ipsius sanguinis fervore*, sæpissime etiam *ex bilis* per hepaticas vias insufficiente sequestratione, neque minus *ex urinosi salis* ad oculos nimia congestione, vel *ex adipis singulari acridine* rancida, aut *ex lemosi ceracei humoris* defectu & blanditiæ immixta, imo *ex ipsius lymphæ*, vasa sua & vasa vicina obstruentis, spissitudine fieri possit, ideoque pro harum causarum differentia longe alia sibi medicamina poscat, quæ si prudenter inquiruntur & debita cura applicantur, effectu desiderato non carebunt. Quare ophthalmia sæpissime & brevi tempore solis nervinis, stomachicis, & roborantibus medicamentis cessit, quæ quamdiu evacuantibus aut temperantibus tractata fuit, semper pejor reddebatur; alia ophthalmia sola temperantia & sanguinis fervorem evacuando vel emendando minuentia sibi poscit; aliam vesicantia & ad urinas ducentia medicamina juvant, & sic porro, ut in prioribus latius exposui. Eademque consideratio non tantum in ophthalmia, sed etiam in aliis oculorum *fluxionibus*, in *epiphora* diversa, in *erosionibus*, in *ciliorum defluxu*, in *lippitudine*, *strumositate* & similibus supra descriptis affectibus adhibenda erit. Nisi enim in humoris peccantis specialem cacochymiam inquiramus, inutilis erit medela.

§. X I I I.

Quemadmodum autem humorum ad oculos tam varius confluxus & ex eorum differentia tam differentes eorum morbi oriuntur, ita non

minus ex *solidarum oculi partium* singulari fabrica functio ejus multiplici modo turbari solet. Nam supra §. 4. jam monui, oculum ab omnibus reliquis corporis partibus in eo differre, quod nullus solidarum ordo reperiatur, qui non ad oculi constitutionem pertineat ac requiratur. Quamobrem tot etiam morbi in uno oculo possibiles sunt, quot in reliquis visceribus singulis fere deprehenduntur, quorumque dijudicatio sine accuratiori fabricæ hujus cognitione difficillima est.

§. X I V.

TUNICA ALBUGINEA vel *adnata oculi ex triplici lamella* constat: *exterior* est productio sive reflexio cutis palpebrarum cum periosteo orbitæ firmiter connexa, & ante bulbum expansa, in statu naturali niveo candore gaudens, quæ trunculos venosos & arteriosos pulchre ramificatos habet; reliqua exterioris lamellæ vascula non nisi pellucidam naturaliter lympham vehunt; ita tamen sunt comparata, ut accedente irritatione per illapsa in oculum acria, aut ex admissio fumo, vel a frictu, aut a lachrymis acrioribus, rubrum sanguinem admittere possint, tumque *momentaneum erysipelas* exhibeant, quiete aut levi fotu facile cessans. Hunc affectum vocavere *taraxin adnatæ*, id est, perturbationem, sive erysipelas superficiale, neque dolorosum, neque visui nocivum. Sunt, quibus hæc taraxis frequentius accidit ex nimia plethora capitis, ex crapula scilicet; in nimis forti collaris strictura; & in pectoris affectionibus, si sanguinis per venas jugulares descensus impeditior evadit. Si autem sine causis ejusmodi externis & accidentalibus diuturna & rebellis albugineæ tunicæ rubedo infestat, ut plurimum de tali causa cogitandum est, quæ *periostea* totius corporis, quorum hæc albuginea pars esse videtur vel saltem maxime connexa cum periosteo sive pericranio, lædit, & in primis quidem de *venerea labe*. Qui enim luis venereæ majorem gradum nanciscuntur, non modo *dolores osteocopos*, sed plerique etiam *tunicæ albugineæ continuam inflammationem* sine visus deperditione patiuntur, adeo ut vasa venosa super albugineam decurrentia, nodosa & varicosa evadant, non fœdo tantum spectaculo, sed

sed cum palpebrarum etiam motus impedimento. Præterea ut reliqua periostea, in statu naturali sensus expertia, si inflammatio accedit, graviter dolent, ita etiam *venerea* hæc *taraxis* vehementer dolorosa evadit. Hi autem solo *mercurio* & *lignorum* decoctis, additis tamen propter calorem doloremque temperantibus remediis, juvantur. Nam Chirurgica pertusio varicosorum nodulorum insufficiens & brevis moræ adminiculum parat. Multo autem difficilius oritur malum, si in eadem hac lamella externa, post prægressam ejusmodi taraxin diuturnam, duriora tubercula nascuntur, quæ *perlas* vocarunt veteres, a pterygio mox describendo in eo diversas, quod dura, elevata & semper ad contactum dolorosa sunt, plane ut *nodi* & *ganglioides* tumores in periosteis reliquis ex causa venerea nati, neque aliis remediis, quam illi, curabiles, cultrum raro permittentes, præprimis quamdiu rubedo inflammatoria albugineæ durat, adfluxusque acrioris materiæ continuat. Præter dictam vero labem etiam aliorum humorum in eadem tenera albugineæ vasa deponi solet, inprimis biliosorum. Nam ex *Icteri* historia patet, hanc tunicam penitus & diu flavescere & a bilioso humore tingi posse; quare ut in aliis membranis erysipelata ex decubitu fellei sanguinis, ita etiam *pertinax albugineæ taraxis* ex sola bile abundante & huc conversa fieri potest, quæ igitur necessario alienam a priori curam requirit. Quin etiam coerulefcere eadem membrana potest: quod si in juventute & infantia contingit, ut plurimum *futuræ phthysæos glandulosæ* & *mesentericæ* periculum indicat, quatenus universi corporis lympham a suo albore naturali deflectere & atrabilia tenacitate inquinari declarat.

Altera lamella tunicæ albugineæ, quæ post priorem expansa est, speciem telæ cellulosæ refert, per quam prior illa cohæret cum tertia. Altera hæc lamella in statu naturali vacua esse videtur, sed præternaturaliter plura ibi concrementa nascuntur, quæ oculo foeditatem & non raro visui impedimentum adferunt. Nam primo ea tela cellulosa ita ampla & laxa fieri potest, ut exterior lamella non recte satis ad tertiam jungatur, sed quasi rugosa evadat, rugisque suis palpebrarum motui quodammodo officiat, quale malum ut plurimum in

illis, qui salivationem mercurialem copiosam & inprimis repetitam sustinuerunt, frequens est, ut ex eo solo quandoque phænomeno eos, qui tali curæ subjecti fuerunt, cognoscere liceat. Si magnæ & valde exstantes sunt rugæ, cultellum requirunt, ut pars albugineæ resecta reliquis ejusdem partibus se contrahendi majorem facilitatem præstet. Collyria etiam aluminosa & saturnina contractionem adjuvant. Deinde in eandem telam cellulosa se insinuant sæpe variæ sordes, a quibus *maculæ* & *pterygia* varii ordinis & variæ durationis oriuntur. Pterygium enim in altera hac tunica hære, ipse adpectus oculi docet, quippe tunica exterior glabra & leniter tantum elevata est, nulla autem asperitas neque ullum verum tuberculum observatur. Hæc pterygia igitur ex *adipis* morbis originem habent, atque maxime tum oriuntur, si per causam aliquam præternaturalem adeps humanus adeo attenuetur, ut in tenerrimam hanc telam, ex qua naturaliter excluditur, intrare, ibique massulam aliquam pinguedinosam deponere possit. Quamdiu tale pterygium in sola albuginea est, visum non impedit, accidit autem ut talis macula successive crescens ipsam corneam vel partem ejus tegat, tumque luminis ingressum turbet & imminuat. Docuit enim PRÆSTANTISSIMUS WINSLOWUS & post eum viderunt anatomici reliqui super ipsam corneam extendi telam cellulosa, naturaliter insensilem fere & præ tenuitate vix demonstrabilem, sed quæ præternaturaliter intumescere & aliquid humoris peregrini recipere possit. Solent ejusmodi pterygia ex variis quidem adipis|vitiis|originem sumere, primaria tamen sunt: primo *rhachitis infantilis*, & quæ pterygia quidem hac ex causa nascuntur post septimum ætatis annum, sponte sanantur; deinde *favus puerilis*, cujus soboles difficiliter cedit; tum *variolæ* inprimis & *morbilli* maligniores, in quibus tota tela cellulosa hominum pure scatet mobili, omnisque adeps funditur, ut mirum non sit, sordes purulentas in oculorum etiam telam cellulosa infundi. Ortus pterygiorum plerumque antecedentem vel comitem habet leniorem oculi inflammationem, quo ipso calore & motu majori adipis ingressus facilitatur. Neque tamen adiposa materia sola pterygia formare potest, sed etiam *ipsius*
san-

sanguinis ex suis vasculis transsudantis particulæ. Id enim verum esse ex eo docemur, quod tota hæc cellulosa tela sanguine extravasato sic aliquando impleatur, ut totus oculus tanquam unus sanguinis grumus appareat. *Sugillationem* vel *hyposphagma* hunc morbum vocamus, qui non tantum ab externis violentiis, rudiori scilicet contusione, contrectatione, aut vulneratione exoritur, sed etiam, & frequenter quidem, a nimio nixu respirationis pulmonicæ, inde fiente sanguinis versus caput congestione; quare in tussi ferina infantum tam frequenter occurrit. Sanguis in hac parte effusus resolvitur quidem & in vasa bibula venosa resorbetur, imprimis si fofus externi vinosi & leniter acetosi cum herbis balsamicis tepide imponantur, non raro tamen pterygium relinquit posthac difficulter dissipabile. Ex his autem, quæ protuli, facile patet, *pterygiorum differentem esse naturam, nec generalem methodum iis dissipandis sufficere.* Quæ enim ex sanguine per arteriarum anastomoses deposita sunt, externis quandoque remediis solventibus non difficulter cedunt; quæ vero ex generalibus *adipis* vitiis originem habent, raro curantur, quamdiu generalis illa dispositio vinci nequit. Adipis autem generalia vitia quandoque mercurium sibi exposcunt; aliquando majori cum fructu antimonialia tali dosi exhibita, ut moveant, neque tamen emesin faciant, dentur; omnium autem maxime stomachica remedia desiderantur, nam quæ chylicationem salubrem faciunt, ea etiam bono adipi generando sufficiunt; id quod imprimis in illis, quæ cum rhachitide, favo & similibus puerilibus vitiis conjuncta sunt, pterygiis verissimum est. Stomachica enim remedia ex cinnamomo, corticibus citri, aniso, fœniculo cum lenissima portiuncula aloës succotrinæ plus hic præstant, quam acerrima purgantia aut vesicantia & alia drastica, quibus pueri sæpe incassum affliguntur quippe quæ malum potius exasperant, quam juvant. Forte non incongruum erit novum hic remedium, quod sua simplicitate & efficacia se commendat, pro stomachico offerre, quodque in materiam medicam nondum introductum scio eo scopo, quodque Auditoribus suis, præter alia heroica in praxi remedia, Clarissimus GAUBIUS in cursu experimentalì chemico, dum lactis

analysin pertractaret, candide communicavit, estque illud *liquor gastricus alicujus animalis*, v. g. *vituli*, qui dum animalium ventriculus a contentis alimentis liber est, continuo in ejus cavum depluens colligitur & a nostratibus *stremsel* vocatur; imo hoc liquore deficiente, *segmentum* ipsius *ventriculi*, sive recentis, sive caute exsiccati, inservire potest, si aqua frigida infunditur & maceratur, & hæc aqua cochleatim præbeatur, exinde forte in morbis ventriculi coctionem lædentibus medicamentum certius invenire possemus, quam in roborantibus stomachicis hætenus habuimus. Fonticuli tamen in brachio excitati, vel in rebelliori malo setacea nuchæ immissa fructum in iis habere solent, quatenus fonticuli æque ac setacea ex ipsa tela cellulosa immediate evacuant, ideoque particulas cacoehymiae adiposæ ab oculis avertere & ad ulceris artificialis locum transferre valent. Frequenter talia pterygia adiposa successu temporis sponte dissipantur, quando propter ætatem aut vitæ genus mutatum totius adipis ratio in homine mutatur aut emendatur.

Tertia lamella aut *tunica membranæ albugineæ* est aponeurosis vel productio tendinum quatuor muscutorum rectorum oculi, per quam bulbus ipse cum binis superioribus conjungitur & colligatur. Atque hæc ipsa tertia lamella illa est, quæ, quia ad scleroticam bulbi membranam accrescit, eatenus etiam cum ipsa cornea transparente ita cohæret, ut ejus laminam exteriorem conficiat, cujus igitur vitia ad corneam sæpe pertingunt, visionisque immediatum obstaculum parant. Contingit scilicet, ut hæc aponeurotica tunica inspissetur, induretur & quasi ossescat aut cartilaginosa evadat, id enim vitium cunctis tendinibus commune est. Tunc macula densa, elevata, dura, doloris expers in confinio corneæ nascitur, successive super corneam serpens, quam instar lunulæ primo ab uno latere tegit, magis autem crescendo tandem magnam corneæ partem, eamque aliquando totam obducit, luminisque ingressum prævertendo cœcitatem infert. Causæ, quæ talem ossescentiam producant, variæ esse possunt, præcipua tamen & omnium frequentissima est *arthritis*, eoque magis quando materia arthritica superiores corporis partes, & inprimis caput

put exercet. Quare qui *hemicraniam* & *clavum hystericum* aut *odontagram* patiuntur, cum tali oculorum malo sæpe conflictari debent, sique semel offescens talis macula incommodum hunc locum obsederit, raro in totum curatur. Præter arthritidem illa quoque *cacochymia*, quæ ossium morbos, *spinam ventosam*, aut *pædarthrocacen*, aut *fistulas callosas* ad *ossa pertingentes* producit, talibus maculis cartilaginosis vel callosis offescentibus oculorum generandis par est, si inflammatio aut quælibet alia externa occasio eam materiam ad oculos invitet aut derivet. Neque tamen negaverim corneam & quæ eam tegit, tertiam illam albuginea lamellam quandoque a *morbis acutis male cedentibus*, *morbillis* inprimis, relinqui. Quæcumque autem causa prægressa fuerit, talis incrassatio offescens ægre, non modo medicamentis, sed etiam operatione manuali superatur. Tamen, si subjectum satis robustum est, tentari possunt remedia interna illa, quibus *callositas* in genere emollitur & consumitur. Quorum remedium præcipua sunt 1°. summa per aliquot menses, ad ipsam inediam usque prosecta ciborum potuumque abstinentia; natura enim consuetis ita alimentis privata vim suam concoctricem in callos convertit, eosque emolliendo & consumendo in nutrimentum quasi convertit, eaque ratione locum callosum emollit & sanitati restituit. Deinde larga decocta guajaci, cujus in fistularum callo dissolvendo non parva vis est. Tum forte aliqua spes est in Antimoniatis remediis rite adhibitis. Externa enim *septica*, quibus in aliis locis callus consumi potest, propter oculi sensilitatem raro hic applicari queunt.

§. X V.

PALPEBRÆ externo & rudi adspectu viles videntur esse membranæ, oculo autem anatomico spectatæ in tam parva mole tot miracula monstrant, ut vel eæ solæ incredibilis sapientiæ Summi Creatoris testimonium exhibeant. Nam in palpebris habemus *lamellam exter-*

nam, quæ cutis faciei propago est; dein *lamellam internam* rubram, vasis sanguiferis non minus quam nervosis filamentis copiosissimis constantem; tum *telam cellulofam*, inter binas ante dictas mediam; porro *cartilaginem lunulatam tarsi* titulo notam, quæ palpebris æquabilem semper sine rugis extensionem conciliat; deinde ductus lemosos, in quibus ceraceus lemarum succus ex sanguine secernitur & juxta ciliarum bulbos in marginibus palpebrarum excernitur; tum ductus *lymphatico-lachrymales*, quos *hygrophthalmicos* vocarunt, lachrymarum fontes; ipsorum quoque *ciliarum* bulbos & scapos; tandem *mirabiles musculos*, quibus ad se accedere aut distrahi possunt, ut oculi bulbus detegatur aut recondatur. Quam ob causam plures sunt palpebrarum morbi, quorum, sine accuratiore harum ad palpebras pertinentium partium notitia, rationalis cura institui non potest. Horum morborum quosdam supra jam tetigi; ubi humorum lachrymalium & lemosorum rationes pathologicas descriptas dedi. Quare eorum, qui supersunt, brevem faciam enumerationem.

Ectropium igitur sive *inversio palpebrarum* est morbus, in quo margines palpebrarum cum rubore tumidi & tunica earum interna exterius replicata spectatur. In utraque palpebra fieri potest, ut labia re-torrida exulcerati carcinomatis faciem quasi referant. Ruber talis circulus non modo adspectu est fœdus, verum etiam pruritu & palpebrarum immobilitate incommodus. Omni quidem ætati & utrique sexui accidit, maxime tamen senibus & imprimis vetulis feminis familiaris, & sæpissime curatu difficillimus. Illa enim curatio, quæ a Chirurgicis Auctoribus præcipitur, ut cutis sub oculo per incisuram lunulatam dividi, atque sic nimia ejus strictura, qua palpebram inverti putant, imminui debeat, ut plurimum inutilis est. Nam si tendo inferioris hæmisphærii musculi orbicularis dilaceratus aut suppurando destructus, ectropii causa est, tum dissectio cutis sub oculo non modo non juvare potest, verum potius nocet, quia palpebram immobilio-rem facit, quam antea fuerat. At vero hæc causa rarius occurrit; potius origo mali frequentior in interiori tunica palpebræ latet, quæ tunica vasculis copiosissimis plena & nulla epidermide tecta, luxurian-tem

tem format carnem, qualis in vulneribus nasci solet, quando humores acriores ad illa alluunt, & quando non accurate in toto ambitu suo a chirurgo implentur & comprimuntur. Luxuries carnis, quam etiam *hypersarcosin* aut *carnem ferinam* Medici & Chirurgi vocant, ut plurimum singularem acrimoniam pro causa habet, quæ stimulo suo vim vegetantem vasculorum adauget, facitque ut extra terminos consuetos moles eorum excrescat. Quare in vulneribus & ulceribus ex præsentia luxuriantis carnis concludere solemus specificam quamdam cacochymiam in eo corpore esse, cancrofam scilicet, vel cariosam, aut veneream, aut scorbuticam, aut aliam similem: nam ubi talis in corpore acrimonia regnat, statim in ulceribus ferina caro nascitur. Ectropium autem, rectè consideratum, revera nil aliud est, quam caro quædam ferina vel luxurians tunicæ internæ palpebrarum, quippe quæ, cum nullam epidermidem habeat, tanquam nuda & excoriata, ut recens vulnus, considerari potest, & quæ ab acrimonia in eam translata simili modo intumescit, ut nuda caro vulnorum facere solet. Quare cuncta acria medicamenta non minus quam usus scalpelli tantum abest, ut ectropium curent, ut potius exasperent. In vetulis feminis præcipue semper fere rodentem & quasi carcinomatofam habet acrimoniam, nec unquam plene superatur; satis est, si malum tolerabile reddi possit. Tutia cum spiritu vini rectificatissimo mista, & recenti cremore lactis contemperata, commodum unguentum est pro senibus. Si autem juvenilis ætas cacochymiam ad oculos versam contraxit, necesse est ut internis remediis huic inprimis obviam eatur: oculis autem externe saturnina unguenta cum fructu applicantur. Sunt tamen, qui ectropium sine singulari tali humorum acrimonia patiuntur, scilicet qui hæmorrhoidibus aut aliis intestinorum vitiis laborant. Mihi enim videtur interior palpebrarum tunica cum membrana villosa intestinorum similitudinem aliquam habere, quippe utræque epidermide nudæ, vasculosissimæ & propterea facile tumentes observantur, ideoque propter paritatem substantiæ similes etiam morbos habent.

Quamobrem tale ectropium sæpe solis temperantibus & simul sto-

machicis remediis, concoctionem juvantibus, & hæmorrhoides leniter promoventibus, curandum est, illisque non difficulter superatur. Hic ectropii tumor aliquando siccus est, sed nonnunquam copiam non modicam muci fundit, muco intestinorum fere similem, & a fluxu lemoso, quem §. 9. descripsi, longe diversum. Qui fluxus mucosus remedia per epicrasin purgantia requirit, ut diarrhæa lenis, mucosa, per plures dies continuata, eum oculorum fluxum, qui quodammodo diarrhæa palpebrarum dici posset, ad intestina materiem ducendo a palpebris avertat. Nam ab epiphora lemosa hanc, de qua nunc loquor, oculorum humiditatem mucosam differre, non modo vasorum, ex quibus funditur, diversitas, sed etiam hoc phænomenon probat, quod ab hoc muco postremo descripto, ex ectropio effluente, palpebræ non, ut a lemis conglutinentur.

§. X V I.

In *palpebris* alia quoque tubercula nasci solent, quæ, pro differenti magnitudine & duritie, nunc *hordeola*, nunc *grandines* appellantur & varium malignitatis gradum, varium ergo exitum habent, neque indifferentur tractari debent. *Hordeolum* enim est tuberculum magnitudine & figura granum hordei fere emulans, a quo etiam nomen traxit, ut plurimum oblongum & in superiori potius, quam inferiori palpebra observatum, licet etiam in inferiori quandoque occurrat. Est durum quidem, neque tamen asperum, sed multum prurit, & postquam aliquot mensibus palpebræ insedit, inflammatione accedente, suppurat, parvumque abscessum format, ex quo materia casei similis, tanquam ex atheromate suppurante, exit, qua suppuratione finita omne illud tuberculum sine ullis reliquiis dispareret, pristinamque palpebræ integritatem sine cicatrice restituit. Sedem ergo habet in illis cavernulis, quæ naturaliter bulbos ciliorum continent, obstructis a materie lemosa ibi stagnante & condensata in casei duritiem. Curatione vix eget, quia nihil malignitatis inest, & a natura sola per inflammationem accedentem facile & perfecte tollitur. Licet tamen suppurationem promovere & accelerare, applicatis externe talibus un-

guen-

guentis, quæ calorem partis augere, neque tamen nimia acritate oculos ipsos irritare & lædere queunt: cui scopo in primis rob sambuci vetus, quod scilicet aliquot annorum mora paulo acrius factum est, convenit; hoc enim tuberculo mane & vesperi illinitum, emollit & ad suppurationem deducit. Maxime eo respiciendum est, ut, quando suppuratur, omnis materia recte & sufficienter expurgetur. Nam si particula materiæ remanet, hæc magis indurata ibi fixiorem sedem occupat, & originem novi & molesti morbi facit, scilicet *trichiasis* vel *inversionis ciliorum*. Plures observationes docuerunt, hanc trichiasin semper ex hordeolo insufficienter suppurato fuisse ortam. Vocatur autem trichiasis, quando unus vel alter pilus ciliorum, qui naturaliter ita arcuatus esse debet, ut superficies convexa oculo obvertatur, cuspis autem externa respiciat, nunc ita invertitur, ut cuspis pili ad interiora reflectatur, illoque corneam & adnatam tunicam contingat, titillet, pruritum ibi & dolorem & erysipelas producat: cui molestiæ nulla alia medela hætenus innotuit, nisi ut pilus ejusmodi inversus, forcipe aut volsella arreptus, extrahatur, qui tamen ex suo bulbo intra mensis spatium denuo excrescens eandem molestiam reproducit, eandem extractionis medelam, ut sæpe repetatur, necessariam facit.

Grandinis autem longe alia, quam hordeoli, ratio est, etsi ab initio similis videatur esse morbus. Grando autem, statim ac apparet, durior est & aspera, neque ita multo post osseam duritiem acquirit, atque, si in sedem ejus accuratius inquiritur, apparet exostosin esse cartilaginis lunulatæ, quam *tarsum* vocant. Nascitur autem grandio in illis præcipue hominibus, quibus etiam aliis in locis morbi ossium & exostoses fiunt. Neque impune hoc tuberculum acribus eroditur aut læditur; nam si semel apertum est, &, exteriori cuticula ablata, aërem liberum admittit, malignitatem quasi cariosam acquirit, & successive totum oculi tarsum exedens miserabilem faciem reddit. Qui lue venerea eo usque infecti sunt, ut narium ossa & palatum & vo-

mer exedantur, hanc etiam tarsi palpebrarum destructionem patiuntur, dum ab initio una vel aliquot parvæ grandines apparent, in quibus rofionis principium fit, ulcere carioso sensim totam marginem palpebræ exedente.

In leprosis etiam tam fœda cartilagineum tarsi consumptio succedit. Neque valde infrequens est etiam in illa scorbutica dispositione, qua ossa emolliuntur & eroduntur. Medici igitur providentia in grandinibus curandis eo tendere debet, ut quam diutissime maneant clausæ; ab omni igitur irritante & acri medela abstinebit, solisque internis remediis eam malignam cacochymiam, quantum possibile est, emendare tentabit.

§. X V I I.

PALPEBRA SUPERIOR ex nervi affectione *paralytica* facta, *ultrò delabens*, atque *oculum obtegens*, *visionemque impediens*, sine ullo alio vitio externo, dicitur phalangosis. Homo hoc morbo laborans, si illo oculo cernere cupit, digitis elevatam palpebram tenere cogitur. Affectus hic nonnunquam morbos soporosos & apoplexiam præfagit. In hoc morbo *levator palpebræ superioris* paralyti affectus esse creditur. Accipit ille nervos a pari tertio: Mirum sane, unicum eum rammum affici posse, reliquis falvis manentibus; qua de re nullus dubitat, qui elevata palpebra viderit oculum quaquaversum se movere.

Curatio difficillima, plerumque nisi per operationem chirurgicam (de qua hic nobis agendum non est) perfici potest. Crediderim tamen ego, prius esse insistendum in indicationibus paralyti accommodatis. Accedit, quod, auctoritate Clarissimi Præceptoris mei H. D. GAUBII innixus, ausim proponere pro remedio saltem tentando, *oleum tartari rectificatum*, destillatione per retortam acquisitum; penetrantissimum ac maxime resolvens esse hoc oleum, omnes norunt, quod primo Clar. LUDOVICUS cum fausto eventu adhibuerat; inungitur linimenti forma, vel cum cera malaxatum applicari potest loco adfecto. An huic morbo *electricitas*?

§. XVII.

LACHRYMARUM VASORUM numerosi morbi sunt, quorum plurimi efficacem manualement Chirurgi periti opem sibi exposcunt, id-
eoque in hac nostra tractatione non habent locum, velut *cancer glandulæ lachrymalis* intra orbitam sitæ, qui sine totali totius oculi ex-
stirpatione incurabilis est; & *ægylops inflammatorius* & suppurans, &
inprimis *fistula lachrymalis* confirmata, ad quam percurandam *Anellia-
na* methodus huc usque tutissima mihi esse videtur. De his igitur nunc
dicere attinet. Interim exempla non valde pauca fistularum lachryma-
lium sponte vel a sola natura, sive manuali operatione sanatarum,
spem faciunt etiam hic leniorem viam aliquando ingredi licere. Quan-
do igitur fistula lachrymalis recens, nec nimium inveterata, neque ossa
hactenus erosa, neque nimium purulenta, & multo minus ichorosa
materia est, quæ effluit; canalis igitur nasalis obstructus quidem est,
sed non destructus; tum profuit aliquando lactis vaccini recentis un-
ciam miscere cum spiritus salis ammoniaci vinosi drachmis duabus vel
tribus, illamque mixturam mediante plumula in eam narem intru-
dere, quæ in latere fistulæ est, sæpiusque de die solventissimum hoc,
neque tamen acre, remedium ad ostium internum ductus nasalis ap-
plicare, vel etiam eundem liquorem forti attractione quasi odorando
in narem adducere, & sic per aliquot hebdomadas aut menses conti-
nuare. Simul convenit semel aut bis in die parvum cataplasma emol-
liens & resolvens externe sub oculo ad nares adhibere, ut ejus calore
& fotu materia obstruens mobilior & fluxilior reddita suæ resolutioni,
a priori medicamine perficiendæ, minus resistat. Proderit simul in-
terna dare remedia, quibus tenacitas muci & lemarum, has vias
obstruentium, solvi & sic externæ methodi efficacia augeri queat.

T A N T U M.

T H E S E S.

I.

*Anatomicæ subtilioris cognitio medicum in praxi certior
rem reddit.*

I I.

*Alimentorum digestio actuositati ventriculi & digestion
chemicæ potius, quam soli triturationi adscribenda
mibi videtur.*

I I I.

Lac minus coctum est, quam sanguis.

I V.

*Triples merito ad motum Cordis continuandum statui-
tur causa, 1^{mo} sanguinis influxus ut stimulus, 2^o con-
tractio muscularis, 3^o nervorum integritas.*

V.

*Forte ex eo, quod venæ cordis coronariæ in ejus cava
aperiantur, rarius cor inflammatione, ulcere, &c.
affectum reperitur.*

F

VI.

V I.

*Quamquam omnium oculi partium utilitas sit, & suum
cujusque proprium munus, cæteris tamen præcellere
videtur RETINA, quippe quæ primarium visionis or-
ganum est.*

V I I.

*Naturæ Vires a medico observandæ, & si sint saluta-
res, imitandæ sunt.*

V I I I.

*Juvantia & Nocentia a medico probe attendi merentur,
utpote per quæ morbi abstrusioris natura nonnun-
quam cognosci potest.*

I X.

*Tendines scissi nunquam, Musculi raro sutura cruenta
indigent.*

X.

*Membrum gangræna vel sphacelo a causa interna affectum
non statim amputandum, sed dato interne & applicato
externe cortice peruviano, ut & acido salis communis,
aliisque patienter expectandus naturæ limes.*

X I.

*In peñoris Paracenthesi operatio potius in parte anteriori
quam in laterali & postica est instituenda.*

XII.

X I I.

Omnes Paronychiæ species, præsertim ab initio, potius applicato unguento Mercuriali fortiori, quam per scalpellum, curandæ sunt.

X I I I.

Ani fistula completa, sive incompleta tutius, jucundius curatur ligatura filo plumbeo facta, quam per incisionem.

X I V.

In vulneribus sclopetariis incisiones suadendæ sunt.

X V.

Judicia circa sanguinem e vena eductum ut plurimum fallacia & invalida sunt.

X V I.

Medicamentorum actio a posteriori potius quam à priori determinanda.

X V I I.

Medicamenta per chemiam acquisita nullatenus contemnenda, cum sint quandoque potentissima.

X V I I I.

Medicamenta Roborantia, Adstringentia ut plurima virtutem suam mutuare videntur ex terra & principio martiali, quibus constant.

X I X.

Venena caute adhibita maximam quandoque in curandis morbis præstant efficaciam.

X X.

Ex ignorantia Chemicæ haud raro errores a medicis sub formularum præscriptione oriri solent.

X X I.

Quando natura est in vehementi motu & impetu constituta & paroxysmi vigent, nunquam fortiores commotiones aut evacuationes moliendæ sunt, sed potius motus sunt moderandi & ad temperiem reducendi.

X X I I.

Convenit interdum motus effrænes morbosos compescere, relicta ad tempus eorum causa.

X X I I I.

Tempestive & statim in principio occurrendum est morbis, atque materia, quæ in vitio est, via quæ est brevissima, evacuari debet.

X X I V.

*Trinum est Medicinæ clinicæ fundamentum: MORBOS
COGNOSCERE, DIGNOTOS JUDICARE, JUDICATOS
CURARE.*

*DISSERTATIO MEDICA
IN AUGURATIS*

D E

HYDROPE IN GENERE ET
PRAECIPUIS HYDROPTIS
SPECIEBUS.

THE FIRST PART OF THE HISTORY OF THE
REIGN OF HENRY THE SECOND

BY JOHN GILBERT WHITE
OF THE MIDDLE TEMPLE

